

敘

古者先王之制首重農桑一夫不耕或受之飢一婦不織或受之寒聖帝肇自北方耕織載在豳風想其豐亨之景雍和之象令人歎慕不已是農桑起自秦中漸及南地故天下後世莫不羨豳原之風惜乎桑蠶廢於往代誤爲風土不宜遂失其傳因而缺利一倍今時際熙皞生齒日繁而秦人僅守一耕治生無增補救無法衣被不敷閭閻漸艱豐歲尙且多困歉年其何以堪凡有識者莫不爲之寒心我

朝重熙累洽和氣致祥凡未舉者皆舉未復者皆復想亦

是政可興之日也有雙山楊子生於吾鄉賦資聰慧才畧性成自髫年卽拋時文矢志經濟博學好問凡天文音律醫農政治靡不備覽學宗孔孟以聖賢之心爲心每勸人以格物窮理敦本復性爲要養身治生爲首人性皆善接之者莫不歡從吾鄉有淫祀自唐迄今千有餘年所費不貲每至其處輒驟生爭端先生每集同人講勸遂罷其祀至今鄉人安於無事吾鄉去城邑甚遠貿易不便先生相地集衆立爲日中之市鄉人便之先生乙巳遊南山見櫟橡滿坡知其有用特買沂水繭種令布其間至今利之先生格致之精洞達醫理嘗針里

人腸胃之瘡預診友人三年之死療久棄之痿症起數載之沉痾親目奇驗難以枚舉而周知多能識見超越深明秦人荒歉逃亡之弊胎於無衣講之極詳且悉遂有樹桑之舉然其事無法不成先生博訪維慤盡得其法其種植灌漑繰解經織之務悉躬親而履蹈之數年之間大獲其益迄今十餘年來高堂有輕煖之奉室家有盈箱之積比閭族黨矜式率由者益衆來求法學手者無遠近先生皆親教之近來吾鄉之童子皆能繰水絲矣向之無衣無褐者今且曳縞而拖縉功有實功效有實效而先生不欲以衣帛之美私諸一室一鄉務欲

月
播之當時垂之奕禩俾人人均食其報因著幽風廣義
一帙連類備載畜牧園圃之制事事親經其立法極善
取效甚捷樂從者皆驗誠致富之良謨也上爲

國家培元氣下爲斯民立生命豈小補哉若人人踵而行
之不過數年之間共歌五袴咸慶大有斯信此書之非
夸也又烏得以小道而目之余於先生爲比鄰之舍葭
苻之戚見之習知之稔故能詳述始末以樂告當世之
仁人君子遍曉鄉鄰共舉此務使秦中家家樹桑人人
衣帛穀自可積而富可永保則幸甚

乾隆五年歲次庚申孟春劉芳頓首拜題

豳風廣義弁言

天生蒸民畀之食以養之畀之衣以被之蓋食出於耕衣出於桑二者生民之命教化之原缺一不可者也夫人生一日不再食則飢終歲不再衣則寒飢之於食寒之於衣得之則生失之則死耕桑之所係大矣哉是以神農爲耒耜以利天下堯命四子敬授民時舜命后稷教民稼穡禹勤溝洫萬邦作乂殷周之盛詩書所述皆以耕桑爲立國之本故孔子籌保庶先富而後教孟子陳王道先桑田而後庠序古者天子躬耕后親桑爲天下先重本也自有生民以來未有耕桑不舉而可以興

道致治者也而不知者反視耕桑爲鄙事曰君子自當爲其遠且大者嗚呼此亦弗思之甚也夫經世大務總不外教養兩端而養先於教尤以耕桑爲首務古聖王之治天下也養之以農衛之以兵節之以禮和之以樂生民之道畢矣吾儒儲學者卽學此農兵禮樂爲治者卽運此農兵禮樂四者乃天德之實王道之本萬古莫之易也若舍此而求奇索隱談玄說妙無非英雄欺人之語有何遠大之可爲且世之人終歲皇皇經營籌畫其塗雖殊其實同歸於衣食獨不思衣食之源致富之本皆出於農農非一端耕桑樹畜四者備而農道全矣

若缺其一終屬不足昔聖王之富民也必全此四者故宅不毛者罰里布田不耕者出屋粟民無職事者出夫家之征卽其歿也不耕者祭無盛不蠶者衣無帛不畜者祭無牲不樹者無椁不績者不衰其加意養道如此人能遵斯四者力耕則食足躬桑則衣備樹則材有出畜則肉不乏自然衣帛食肉不飢不寒取之不盡用之不竭不出鄉井而俯仰自足不事机智而諸用俱備日積月累馴致富饒世世守之則利賴無窮若棄自然之美利圖難必之貨財縱聚珠盈斗積金如山飢不可爲食寒不可爲衣故諺有之曰百年無金珠何傷十日無

粟帛身亡是以寒者不貪尺玉而思袒褐饑者不顧千金而美一餐故明王貴粟帛而賤珠玉重農民而輕商賈我

皇上宵衣旰食首重農桑使倉有餘粟篋有餘帛登斯民於富壽之域而承流宣化之賢莫不仰體

聖意留心本務但秦人自誤於風土不宜之說知耕而不知桑是有食而無衣至於樹畜失法又乏資助之益故每歲之中必賣食以買衣因衣之費而食已減其半又兼諸凡之費莫不取給於一耕四者缺三烏得不窮所以豐凶俱困衣食兩艱稍有荒歉則流亡載道人但知凶

荒始於無食而不知其實胎於無衣余詳考屢察深知其故每思所以治衣之法試諸木棉麻苧厥成維艱殫思竭慮未得其善因誦邠風一詩及孟子陳王道諸章頓有所悟夫邠岐俱屬秦地先世桑蠶載在篇什可考豈宜於古而不宜於今與余因而博訪樹桑養蠶之法織工繰絲之具頗得其要自樹桑數百株歲在己酉始爲養蠶其年蠶成所繰水絲光亮如雪能中紗羅綾緞之用迄今十有三載歲歲有成親經實驗已獲其益仰體我

皇上加意農桑愛養斯民之至意不忍私諸一身竊願推以

及人因集是編顏曰邠風廣義若家戶行之則稼穡之外復增利一倍每樹桑一畝歲可得絲九斤若樹桑十餘畝歲可得絲百餘斤不特五十之老可以衣帛卽賦稅婚喪之費亦可取給於此豐衣足食之樂可立而待矣然桑蠶旣舉而孕字之事缺焉不講何以佐農桑之不逮衣帛之老又何能食肉乎余特揀採善法精尋實效求其切於日用家家可畜者猪羊雞鴨之法俱親經有驗連類而備載之能依法牧養則孳生不窮不特七十之老足以食肉卽八口之家亦有餘甘矣更思秦中園圃久廢樹藝失法追倣素封之意自制一園名曰養

素已見實效附於蠶畜之末以公同志是編也始以桑蠶補歲計之不足繼以畜牧佐農桑之不逮終以園制爲士人養高助道之資此余殫十餘年之苦心親身經歷而輯成者非徒抄撮成說道聽耳聞者可比授之剗厠用廣同人敢自附於作者之林乎亦庶幾利用厚生之一助云爾

乾隆六年季夏上浣茂陵楊 岫雙山氏題於會心齋

舍

陝西西安府興平縣監生楊岫謹爲敬

陳桑蠶實效廣開財源以佐積貯裕國輔治以厚民生事恭惟我

朝定鼎以來

皇恩屢沛厚澤深仁淪肌浹髓岫雖跼伏草莽敢忘雍熙

大化念野人曝背食芹猶欲上獻今有桑蠶美政已獲親經實效上廣倉廩之儲蓄下備生民之衣帛開利之源莫大於此實有補於

國計民生豈能隱忍不言然事雖平常實係生民重大之務非三申五令遂可成功若非爲天地立心生民

立命建功立業之賢忠君愛民之誠豈能任斯勞苦
以行永久岫夙懷此願未敢輕舉今欣逢

憲天大人學宗東魯德備中和建伊傅之事業著周程
之文章

特簡撫秦保赤爲懷痼癥在念想桑蠶美政久在

仁心籌畫之中岫非爲名亦非爲利緣仰體

大人愛民至意採訪之殷謹摭愚者一得之見敬陳利
弊願獻芻蕘之言伏祈

俯覽竊惟經國之大務無過於農桑二者乃斯民衣
食之源王政之本是以古來聖君賢相莫不以此爲

懸務故孟子陳王道亦必以農桑爲政首七篇之中
平宜反覆皆不出此我

聖祖仁皇帝念切民依垂訓十六條倫常而外首重農桑嘗

刊耕織圖頒行中外使知務本之至意蓋未有農桑
二政缺一而可以興道致治者也而承流宣化之賢
莫不欽奉

聖諭留心本務農桑並舉固已民安物阜矣獨是秦人自
誤於風土不宜之說知農而不知桑是有食而無衣
二者缺一則民失一倍之資至於木棉麻苧又非秦
地所宜絲帛布葛通省無出雖厥土黃壤厥田上上

自桑蠶一廢五穀之外百無所生究不能全獲地利常有飢寒之患夫一女不績天下必有受其寒者而况通省之不績乎雖有數縣本棉之出然不過一縣中百分之一不足本地之用豈能廣布通省是以秦人歲歲衣被冠履皆取給於外省而賣穀以易之穀賣之於遠方是穀輸於外省矣絲帛木棉布葛之屬買之於江浙兩廣四川河南是銀又輸於外省矣每歲必賣食買衣因衣之費而食減其半其艱於食者固自不少而缺於衣者抑已良多夫農一歲之入能有幾何貢賦賴之八口賴之婚喪賴之兼之一歲之

衣被仍賴之焉得不豐歎並困而衣食兩艱耶豐則粟賤金貴而公私並需一糶無餘歎則室如懸磬而流亡過半無衣之害一至於此尙望其有餘積乎古者耕三餘一而秦人之積無異酌涓水而實漏卮矣

岫

生長於斯深知秦人兩困之原踵自無衣且嘗親

受其累每思所以治衣之法試諸木棉麻苧厥成維艱竭思殫慮十餘年來考諸詩書傳記方知蠶桑乃秦人本有之業但因往代兵燹之後砍伐始盡物易人遷樹桑養蠶之法盡失其傳後世習而不察誤爲風土不宜之說因而棄置不講所以桑蠶之業久廢

女工之事不作無人焉以倡率開導之遂棄無窮之
地利委諸土壤以自有之衣具仰給鄰邦甚屬可惜
岫因博訪樹桑養蠶之法織工繰絲之具無不按其
規程盡其法則先自樹桑數百株於己酉年始爲養
蠶鄉人每有笑其迂濶難成者岫亦弗之顧惟日夜
經營無少懈怠既而蠶成及繰水絲之日鄉人乃共
相環視見其絲堅韌有色光亮如雪覩所未見莫不
驚異由是鄉鄰之中多有倣之養蠶者迄今十有三
年歲歲見收近來鄰邑亦有慕倣者但欲養蠶者雖
多而樹桑者甚少徒作羨魚之歎而罕結網之思若